



蜀郡縣古今通釋卷之一

畏天畏人

法中曹學徐能始著

四川布政司

說文川者穿也水穿地而流曰川桑欽水經云大江出蜀是矣唐分劔南道為東西二川宋析為益梓利夔四路元為四川行省

國朝因之為四川布政司○或稱三川者非三川也洛之地司馬錯勸秦伐蜀曰周自知失九鼎韓自知亡三川是也漢武帝元鼎年以蜀郡廣漢犍為為三蜀獻帝建安年分巴東巴西永寧郡為三巴巴蜀維

積德名家

百

四

別猶可槩稱

### 川西道屬

成都府

管六州二十五縣

帝王世紀云周太王從梁山止于岐下一年成邑二年成都蜀本梁州之域毛詩奕奕梁山惟禹甸之尋江源記云梁山首跨劍閣而尾入江矣故秦置縣曰成都○人皇之世九圍而蜀圍居其一黃帝之子昌意娶蜀山氏女生帝嚳封其支庶于蜀始為蜀國爾雅釋山蜀者獨也言不與他相連屬也漢武帝置益州益者阨也以其地險阨而益廣也唐玄宗西幸始

改成都府陞號南京以地當長安之南矣其時長史寔稱尹而知府則起于王蜀武成云○昔者州郡之分猶今之道府也州曰庸部郡曰導江則在王莽時州曰司隸郡曰成都則在公孫述時益州置牧蜀郡置守則在先主時刺史治太城太守治少城則在東晉時益州總管府劍南節度使則在唐開元前一路安撫使四路制置使則在宋南渡後

### 成都縣

秦司馬錯張儀滅蜀置釋同郡華陽國志云縣有十二鄉五部尉

華陽縣

禹貢華陽黑水惟梁州梁彊梁也西方金氣彊梁之  
義周有天下併梁於雍二州俱以華山為主雍之有  
華陰猶蜀之有華陽也唐初爲蜀縣析成都置乾元  
中易今名

郫縣

杜宇名蒲卑都於此邑冢至今存秦因以卑名邑也  
唐垂拱初割成都之西鄙置犀浦縣取李冰所剏石  
犀爲名宋熙寧中廢爲鎮今爲浦在郫縣東二十五  
里  
稱益州牧治此

新都縣

漢高六年與廣漢郡同置三都之一也亦曰新都邑  
界有王稚子墓稚子郫人遂有斯目按後漢書注郫  
故城在今梓州郫縣西南而此曰新以別之又地理  
志汝南郡有新郫後漢改曰郫丘章帝徙宋公之處  
也韻書廣漢之郫千洛切汝南之郫先稽切

溫江縣

江水至此始溫也濯絲有色後魏時立矣漢曰湔氐  
道隋曰萬春今縣之長春鄉是其故址

新繁縣

秦曰繁以界有繁江也謂之繁田蜀姜維徙涼州降胡于繁遷其民于新縣故曰新繁

### 雙流縣

李善注文選江水出岷山分為二經成都東南故左思曰帶二江之雙流也漢曰廣都即蜀三都之一隋避煬帝諱改今名○廣都水驛在今華陽縣東南

國朝隆慶初廢○志云蠶叢故都城距縣南十八里

### 崇慶州

管新津一縣

蜀州也三國志云益州之地仰給于蜀宋高宗大觀元年封蜀國公至紹興中乃陞為崇慶府元降為州

國朝因之○漢曰江原以江水所由也有江源祠莽曰邛原以與臨邛近也濱文井江晉曰晉原以有晉原山也即鶴鳴山唐曰唐安以獲安唐室也近西巡時今唐安為驛而江原為鎮矣

### 新津縣

李膺益州記云皂里江津之所曰新津市周地圖記云閔帝元年於此立新津縣也

### 彭縣

周彭國也武王伐紂彭人與焉又云錢鏐之封邑矣華陽國志則以兩山對闕有天彭之號也○梁天監

中立東益州以在益州之東益州記云彭號小郫土地肥良比之郫邑也袁隲記云九峰高峙濠水潄發後周之九隴隋之濠州取諸此矣○志云今縣西二十里之三郎鎮即九隴故址縣東二十里之濠陽鎮即濠州故址

### 崇寧縣

析郫導江九隴三縣所置以唐曰唐昌宋曰永昌道君崇寧初改為崇寧

### 灌縣

李冰傳江水堰流以灌平陸謂之灌口貞觀曰灌寧

孟蜀曰灌州也○上古為魚鳧氏之國今有魚鳧故城○三國曰都安水經注云即都安堰也諸葛亮北伐以此堰農大國之所資發征丁千二百人主護之有堰官宋勅永康軍兼管堰事 國朝尤慎重焉冬閉時脩春開時祀水利道主其事間行別駕及灌令代○齊曰齊基曰青城唐曰盤龍曰導江宋曰永安軍又改永康軍○青城山杜光庭記云岷山連峰接岫千里不絕青城乃第一峰也○盤龍山益州記云山土色黃盤迴有龍形○導江水經注云岷山徼外江水之所導也○永安軍寰宇記云宋初沿貞觀鎮

靜軍之號也。○志云青城廢縣在治南六十里盤龍廢縣即治內導江廢縣在治東二十里今爲導江舖永康廢址今爲永康驛

威州 管保縣一縣

蜀後主時姜維馬忠等討汶川叛羗此其地也自晉以後羗夷叛服不常以其地置薛城戍唐初白狗羗首領鄧賢仇內附乃于姜維故城置維州以統之後改爲維川郡焉王孟二蜀繼有其地徙就中州城即今治也宋平蜀後以京兆發維州誤至維州因改曰威州取威制西羗之意維威音亦相近云○廢通化

縣唐咸亨二年刺史董弁招慰生羗于此置小封縣在西蕃通鶴軍垂拱二年城爲北蕃所沒改置在威戎軍西本志云在州之通化里與金川漢化禪師相近

保縣

唐天寶中置天保郡乾元中改保州孟蜀復改保寧縣也 國朝洪武十八年去寧字以避保寧府

茂州 管汶川一縣

禹貢岷山導江發迹於此水經注云岷山即瀆山也水曰瀆水矣冉駝氏之國按白馬黑面曰駝駝夷名

也史記南越破後冉駝等皆震恐請臣置吏漢武帝元鼎六年以冉駝爲汶山郡汶當作漫古字汶岷通用王羲之游目汶嶺是也按地里表云汶山在茂州汶山縣岷山在西北如此則汶岷乃二山梁曰繩州普通三年置桃關之路以繩爲橋因作州稱隋曰會州謂其爲西夷之交會也唐貞觀始改茂州以茂濕山爲名言山之草木叢茂雲霧潤濕矣

### 汶川縣

漢之綿虎縣也虎有角曰虓行水中地有此獸矣晉置汶川州于此周武帝保定四年移汶川州於廣陽

縣州廢乃置汶川縣

### 簡州

蜀漢簡雍爲先主鎮牛鞞牛鞞漢縣名牛鞞之水出焉山曰賴簡池曰簡池皆民懷雍政也隋始于此置簡州矣○西魏之陽安以山名今爲驛隋之平泉以泉名今爲鎮驛在治前鎮距西南五十里

### 資縣

陳畱風俗傳及姓纂云資姓黃帝後在益州資中今邑之山川皆曰資從賜姓也○寰宇記云廢銀山縣在資州東南三十八里以山名龍水縣在龍龜溪之



左以水名志云今之銀山鎮龍水鄉是也

資陽縣

邑當資水之陽齊建元間置又曾于此縣立資州矣  
○通志云盤石廢縣在縣北三里有石狀如盤陀月  
山廢縣在縣境宋析入者有山形如明月

內江縣

本中江也與外江列入瀘州合流縣為後周所置隋  
室之先諱忠改曰內江周以前曰漢安成宋別名安  
夷軍○按今中江縣之水本內水蜀志先主從內水  
入涪是也而內江縣之水本中水以在內外水之中

也沈約宋書云資江為中水涪江為內水恐因縣名  
而反混水名故特表之

仁壽縣

西魏之隆山郡也即鼎鼻山其山隆起又曰隆山矣  
周閔帝元年於此置陵州蓋因張陵而名陵井又因  
陵井而名陵州也隋置縣曰仁壽從文帝年號○廢  
貴平縣後魏恭帝與平井可曇二縣同立以隸和仁  
邵也今之貴平鎮入簡州界廢籍縣梁天監置席郡  
隋廢郡為縣後訛席為籍也今籍縣址入雙流界廢  
陵井監宋大觀四年改為仙井俱併入當縣

井研縣

隋置古之善計者曰研計然亦名計研也此邑鹽井之利出于心計乃以研系井而為名與寰宇記云有山俯臨井鑊名曰井鑊山方言關東呼鑊為鹵研○魏之蒲亭隋之始建皆在鑊山界上周地圖云蒲亭縣有鑊山諸葛亮取為刃器因封宇文度為鑊山侯即此

金堂縣

西魏置金淵縣唐避諱改金水咸亨中析立今縣曰堂者地寬平處也漢之牛鞞縣地宋併懷安軍入焉

又名懷口今為懷口巡檢司去縣東南五十里○古縣附金沙水舊屬簡池今縣連金臺山舊屬新都

漢州管什邡德陽綿竹三縣

漢高帝六年置廣漢郡於乘鄉一名絕鄉廣大也言能廣大漢業也東漢益州刺史治唐初立漢州天寶中於此立德陽郡○華陽國志郡治雒縣以洛水所會也源出洛通山矣元至止中省廢址在州北三里○寰宇記蒲陽故城漢陽廢城俱在城南

什邡縣

漢雍齒封邑年表作什邡土地譜云廣漢領縣十以

應十幹縣當酉位酉十數也古碑邠水流爲十故名  
什邠今雒江出關口東枝六西枝四而縣居其中矣  
後周改方亭縣今爲里

### 德陽縣

漢曰德陽以德水之陽也晉曰旌陽以旌水之陽也  
孝德旌異皆因姜士游士游綿竹人當縣後漢析綿  
竹所置綿竹故城在治北三十五里諸葛瞻戰敗處

### 綿竹縣

漢縣也劉焉徙益州治於此地理志云紫崑山綿竹  
所出後周改孝水以姜詩宅在沈鄉爲名至隋仍舊

○沉鄉一曰沉鄉何武封邑

### 綿州

管彰明羅江二縣

左綿也地居綿江之左漢爲涪縣以涪水所經矣曰  
巴中即巴西也曰瀘州即金山也曰鹽泉即魏城也  
今名隋改○州治內有金山驛治東五里有巴西渡  
東北六十里有魏城巡檢司

### 彰明縣

後魏之昌隆縣唐避諱改昌明後唐改曰彰明矣李  
太白之所生也

### 羅江縣

左水自安縣來右水自綿州來合於縣之東北蹙成羅紋又謂之紋江也唐天寶置○晉初曰萬安李膺記云晉於梓潼水尾萬安故城置萬安縣是矣今爲驛○晉末亂移就潺亭水經注云潺山石下有泉曰潺水今縣北三里有潺亭廟碑磨滅潺亭字見存

### 安縣

唐武德置以界有龍安山云元爲安州國初爲安縣即隋之神泉縣也郡國志云縣三十里有泉十四穴甘香異常飲之已癘疾故曰神泉唐永淳年復置西昌縣取西昌山爲名矣今縣三十里有西昌市南五

十里有神泉廢縣址

龍安府

管三縣

西漢北部都尉治東漢之陰平郡也水經注曰岷山之西有龍冢按梁普通中武陵王蕭紀僭據土人李龍遷保此番漢德之西魏平蜀始置龍州保其名矣向爲龍門州郡元棄爲龍州宣尉司 國朝嘉靖四十五年改流系以安字

### 平武縣

晉於陰平郡置陰平平廣二縣隋改龍州爲平武郡也與龍州改流之年並設

江油縣

以江水所由也後加水旁矣蜀漢馬邈守江油即此初屬保寧嘉靖末改屬本府

石泉縣

汶山郡之石紐村禹所生也漢廣柔縣矣城北岩下有甘泉乃石泉軍之始初隸成都嘉靖末改屬本府

青川所

有青川溪源出番界又啼胡山水出清美謂之清水也天寶中置清川縣於此 國朝洪武四年置所在龍安府東百二十里隸焉

松潘衛

地出甘松後魏以之名縣矣唐改松州潘吐蕃姓也洪武初設松州潘州二衛尋合為一置軍民指揮使司○唐天寶為交川郡後周為龍涸郡水經注云自白馬嶺回行二千餘里至龍涸是也

小河所

涪江支河也古曰涪陽 國朝宣德四年置在松潘衛東百九十里隸焉

豐溪所

氏羗之地漢蠶陵縣後周置翼斜郡唐曰翼州以夷

水遠其地分流如翼也 國朝洪武十一年置取圖  
經壘石為巢置所

蜀郡縣古今通釋卷之二

閩中曹學佺能始著

上川南道屬

嘉定州 直隸管六縣

漢犍為郡之南安縣地也治青衣江會應劭注漢書  
曰順帝改青衣縣為漢嘉以公孫述稱帝青衣人不  
賓光武嘉之也後魏於此立眉州尋改青州蓋取峨  
眉青衣水之義矣宇文改嘉州也宋寧宗潛邸陞嘉  
定府今仍其名為州○寰宇記云嘉州治龍游縣隋  
開皇初伐陳有龍見江水引軍故名又云州治對江

四十里有平羗縣本漢平羗戍也周保定置縣○今州之遙運所是龍游縣址平羗驛是平羗縣址青衣舖是青衣縣址

### 峨眉縣

兩山相對狀如峨眉後周所置也青衣平羗舊理此○隋之綏山唐之羅目二縣入焉縣西四十里即綏山址葛由賣木羊處也縣南三十里即羅目址本羅蒙山訛爲羅目也今之木羊鎮羅目街是

### 洪雅縣

界有洪雅川源出離堆離即雅也後周立洪雅鎮隋改爲縣或謂葛洪寓居縣之花溪上昇故名

### 夾江縣

隋於夾江戍置縣蓋分龍游平羗之地亦曰涇上志引山海經云夾水出於其陰也○漢爲南安縣今之南安鄉是史記年表宣虎以破臧荼功食邑於此

### 犍爲縣

漢武置犍爲郡治犍今之馬湖平夷司是保乾圖曰犍有乾山形如牛後周於沉犀山下置沉犀郡隋於大鹿山下置犍爲縣志古也玉篇曰犍似豹人首一目爲即猴大篆爲作兩猴○隋之玉津唐之應靈入

為縣治上流即壁玉津也界大牢鎮即古應靈也

### 榮縣

周十亂榮公之采地其後夷公之墓在焉又曰古有榮隱先生居此唐置榮州治旭川縣榮旭之義通矣宋光宗潛邸陞為紹熙府今復縣名榮也○志云縣南八十里有公井故城即唐之公井縣址縣西八十里有缺山即晉之資官縣址皆併當縣

### 威遠縣

隋於威遠戍置縣取威撫遠人之義國初省入榮後復割榮之益昌鄉以益之

### 眉州 直隸管三縣

地在峨眉山陰以之名州自西魏始寔治嘉州若梁之齊通郡隋之通義郡唐之別置眉州則今理矣宋時陞為防禦使治眉山蘇子瞻所謂眉州眉山共一城者也晉置西江陽郡子由詩予生雖江陽指此

### 彭山縣

秦之武陽梁之靈石也漢昭帝已後及晉宋犍為郡皆理於此隋曰隆山縣屬陵州唐貞觀中以縣屬眉因界之彭女山為名又曰取彭亡山岑彭所惡也○隆彭皆高大之稱義或本此



青神縣

本南安縣地後周置今縣以青衣江所注也蠶叢水青而教蠶事蜀人神之故曰青神又曰水濯衣即青

丹稜縣

齊之齊樂郡也後周洪雅縣地隋析出為丹稜取多稜川之名矣寰宇記多稜川有獠居焉即此

邛州 直隸管二縣

漢臨邛地以臨乎邛岷矣。○廢火井縣隋大業置博物志云臨邛火井諸葛亮觀之轉盛是也廢依政縣後魏時置寰宇記云即秦之蒲陽縣也。○今州南二

十五里有火井壩巡檢司州東七十里有依政縣故址

蒲江縣

漢宣帝地節中穿蒲江鹽井增鹽鐵官西魏始置縣又立蒲陽郡以統之今縣南八十步湧泉方丈蒲草生焉古蒲頓也

大邑縣

寰宇記唐咸亨中分益州之晉原縣置其壤廣大因以為名。○有霧中山是號霧邑

雅州 直隸管三縣

取雅安山爲名李冰所鑿離堆在其地也離音雅坤  
元錄郡國志通鑑釋文皆言之秦滅楚遷嚴王之族  
於此曰嚴道矣西魏置蒙山郡隋改今名

名山縣

漢青衣嚴道二縣界西魏始置縣謂之蒙山域中有  
蔡蒙也隋以二山著名禹貢改蒙曰名終唐世皆曰  
漢源宋乃仍舊○今縣東北七十里之百丈驛則唐  
百丈縣焉圖經云山有一穴口圓百尺深百丈漢王  
陽所畏道也

榮經縣

唐武德初始置縣於榮經水口成榮經二水名也乾  
符中曾改爲金湯軍宋初復舊

蘆山縣

漢之靈關道也界有蘆奴山於衆山特小隋煬帝始  
以名縣 國初加草字以山出葭蘆矣

黎州安撫司

漢誅苻侯於苻都立沉黎郡以水沉黑名也後周與  
宋皆曰黎州元始外爲土司 國朝因之增置大渡  
河千戶所漢旄牛都尉清登州及漢源縣皆置於此  
天全六番招討司

蠻獠之墟三代為氐羗西魏始陽縣地也在唐羈縻屬雅州都督五代土人高彙閣藏等歸附置碉門黎雅長河西魚通寧遠六安撫司元於碉門置六番小溪置天全二招討 國初合而為一所轄部落有馬蘇金楊隴東西碉六村謂之六番高姓世招討使楊姓副之

建昌道屬

建昌衛

漢越嶲郡隋唐之嶺州也咸通中蒙氏設建昌府元置路 國初改府尋廢為衛仍設行都司以統之領

禮州昌州等千戶所及長官司

禮州所

在建昌北六十里漢蘇示縣也隋曰蘇祗唐曰蘇祁元曰禮州 國初置後中二所吐蕃號為龍麼城 德昌所

在建昌南六十里漢邛都縣地元置德昌路國初改府尋廢宋時號阿屈部

打中河中前二所

在建昌西百四十里亦邛都地唐曰沙野城元為瀘州地河源出吐蕃下流合金沙江一名黑惠又名納

夷

昌州司

在建昌南二百里蠻名阿屈部元始置州國初棄為長官司

威龍司

在建昌東南四百十里夷名巴翠部元始置州洪武中棄為長官司

普濟司

在建昌西南二百四十里夷名圩甸元始置州洪武中棄為長官司

越雋衛

漢郡名邛都國闡縣治也應劭注漢書界有雋水謂越此水置郡以章休盛也元為邛部州國初立衛廢為長官司矣衛在建昌北一百八十里司在衛東

寧番衛

在建昌北百九十里邛都國地也元為蘇州亦取蘇示之名國初因之為衛後以地當諸番之衝改易今名領冕山橋千戶所在衛東百二十五里山在橋東狀如冠冕

會川衛

係

君鼎通雅 卷之二  
在建昌東南五百里漢會無縣唐會同府也蒙氏呼  
會川邏若漢語安樂城然國初立府領武安永昌麻  
龍等州縣麻龍又曰麻泥若漢語黃土城也尋改爲  
衛領迷易千戶所在衛西八十里

### 鹽井衛

元置閏鹽縣有黑白鹽井矣國初因之又於此立栢  
典州尋改今名在建昌西三百里漢之定祚縣也蒙  
氏爲香城郡宋時名賀頭甸元初爲落蘭部領打冲  
河所及馬刺長官司在衛南五百里

### 下川南道屬

### 敘州府 管十縣

古夔國所謂夔道縣也西漢建爲郡理梁命先鐵定  
夷獠于此乃以成州木嶽示收和書改今名取西成  
即敘之義○按西漢建爲郡此已先之矣後始移武陽

### 宜賓縣

唐之義賓縣也取其慕義才賓矣宋政和年改義爲  
宜○後周曰外江以水名謂漢口郪郪以山名

### 慶符縣

界有集慶迎祥二山宋政和中與梓州同置實唐之  
撫夷縣也寰宇記曰石門路即隋史萬歲南征道○

志云宋有來附將乃其常縣同置者今半復舖是

### 富順縣

漢江陽縣地有鹽十一利後周立富世縣唐避諱改富義矣宋廢縣立監始改今名亦諱也治平中復為縣元時為安撫又為州

### 南溪縣

漢晉南廣縣以拓地於夷也梁立八同郡言六合所同矣後周曰南武疇曰龍源皆稱成仁壽中始改今名蓋地居楚溪之南云○龍源成今龍騰驛是

### 長寧縣

輿地紀勝曰漢陽縣今長寧軍也按漢書漢陽縣隸為都尉治所蓋夷徼云唐置州曰長寧宋改為軍立武寧縣隸之其曰鹽泉縣曰涪州曰涪井監皆以鹽名漢陽者謂自漢武南征此之南皆漢地矣

### 高縣

古夜郎地唐之高州也界有宋水即宋州矣高宋舊皆羈縻州

### 筠連縣

漢定川寨唐之筠連二州也元合為一隸永寧路天

珙縣

西南夷部羅計羅星地也唐為羈縻薩鞏二州鞏音近珙故名或曰珙玄玉也有石似之

興文縣

西南夷部界有晏山唐儀鳳中拓地以為州名元立大壩府繼陞戎州 國初之戎縣也萬曆元年平九絲改今名取偃武滄文之意

隆昌縣

古昌州地也隆慶改元置理隆橋驛二義兼取矣 建武千戶所

在宋為九絲山都掌地 國初隸戎縣萬曆元年討平以其山都六鄉置所對興文也城曰武寧

馬湖府

管屏山一縣四長官司

漢牂牁郡地也界有龍湖中潛龍馬晉以之名縣矣唐始置羈縻四州于此曰馴騁浪瀉元立馬湖土府國初因之弘治八年改流

屏山縣

萬曆十七年置於附郭取寶屏山為名

泥溪長官司

唐長慶中縣名也界有此溪

平夷長官司

漢之平夷縣也其半為鬻縣地晉曰平夷郡

蠻夷長官司

至元初宣撫司之名後以宣撫為馬湖路仍立今司  
沐川長官司

唐高駢平沐川寨築城於此故址尚存

瀘州 直隸管三縣

江受瀘水也州在梁時治馬湖江口故遙取之宋淳  
祐中余玠徙治神臂山元徙今理在江之南○漢曰  
江陽有江陽祠唐曰瀘川即瀘川驛

納谿縣

瀘川縣地宋初于納谿口置軍寨唐羈縻有納州以  
納水所自出也置縣始在紹定中元移治江北

合江縣

漢符縣東漢符節縣地也梁稱安樂戍後周取合符  
之義始置縣○安樂戍故址在縣東五里安樂山

江安縣

本江陽地昔平漢安獠置縣于此曰漢安矣隋取二  
義而改今名○廢綿水縣在綿水溪口今為綿水鄉

瀘州衛



國初調長安衛官軍征滇回駐守州治成化初山水  
都掌亂遷于宋江渡水源出夷界宋州

### 永寧宣撫司

介江安合江二縣境古蠻夷地也漢屬益州郡晉始  
置永寧縣屬雲南郡唐元和初立祖叱末彌為酋長  
改縣曰蘭州宋廢州移治于魚漕溪口稱永寧路元  
改今司領筠連州騰川縣國初割筠連入敘府騰川  
廢為司地領太平九姓二長官司

### 鎮雄府

古號屈流大雄甸芒部所居宋始置都大巡檢司名

西南番部元稱芒部路隸雲南 國朝仍舊名為軍  
民府嘉靖初土官隴政兄弟爭立改流易名夷語謂  
涼為雄石為砮鹿為砌界有砮砌雄山謂山石類鹿  
而高聳清涼也今仍為土府而印文無土字

### 東川軍民府

古東川甸也烏蠻居之南詔蒙世隆始置東川郡元  
改萬戶府國初牟仲由之裔祿設姑歸附改今官楊  
用脩引樊綽雲南記云界有蒙樂山出比翼鳥即蔡  
蒙旅平之蒙山也未詳

### 烏蒙軍民府

古賈地甸漢牂柯郡地也唐時烏蠻阿統居此其裔名烏蒙者部落強大號烏蒙部宋世封烏蒙王元為路隸雲南本朝改軍民府土官祿姓夷語謂首為烏烏撒軍民府

古名的巴甸烏蠻居之宋時其裔有析怒者拓地自強部號烏撒元子置招討司尋改軍民總管府復改宣慰司以烏蒙川芒部隸焉國初改軍民府隸雲南洪武十六年隸本省

蜀郡縣古今通釋卷之二終

蜀郡縣古今通釋卷之三

閩中曹學佺能始著

上川東道屬

重慶府管三州十七縣

周巴子國秦使張儀滅巴立巴郡遂城江州二漢因之獻帝特巴分為三江州是永寧郡理梁改楚州以地隣乎楚也隋改渝州以江受渝水也唐天寶之南平郡宋崇寧之恭州又因而屢改矣後以光宗潛邸始陞府名重慶重慶者以介乎順紹二慶之間也紹慶府為今之彭水縣

巴縣

水經云巴水至江州城下與岷江合也江州寔縣名秦漢至南齊皆因之永明初移置棘溪口始有巴名

江津縣

地居江之津也南齊移江州縣於棘溪口即此西魏曰江陽後周又增置七門郡改陽為津自隋始

南川縣

唐初割渝州東界置六縣其一也以地枕棘溪南云

長壽縣

長壽山名寰宇記云山下有老人村也縣國初置

寔秦漢之枳唐之樂溫地矣○志云縣東北五十里有樂溫灘即故縣址元立涪陵建檢司于此

大足縣

唐乾元二年與昌州同置取豐足之義也或云縣之寶頂山有巨人跡

永川縣

亦唐乾元置地枕侯溪水山川濶永故以為名

榮昌縣

乾元間於此立昌州及昌元縣今名洪武四年改介於榮州也○府志舊州埧有昌州巡檢司又云榮昌

治西昌元里即唐昌元縣址亦嘗充靜南軍使

綦江縣

夜郎之境古綦市也舊隸南平軍明玉珍始置今縣國朝因之萬曆二十七年初應龍叛入其郭踰月乃復○此縣舊名賓化屬南平軍元時為綦江長官司

壁山縣

寰宇記云界有孤山壁立西北險峻東南削平號為重壁唐至德初置縣於此因以為名

合州 管銅梁定遠二縣

在涪漢二水會合處秦漢及晉之墊江縣也今州西

魏始置而墊江之名徙入忠州矣○廢涪陵郡隋大業置志云今州治即隋之涪陵郡蓋與州同理者○廢石鏡縣魏恭帝置志云涪江中有石鏡如月水落時高可三丈有唐人題刻○廢漢初縣隋大業置寰宇云即魏之清居郡也○廢赤水縣隋開皇置寰宇云界有赤水之源也○志曰廢赤水址在州西北百三十里廢漢初址在州西北百九十里

銅梁縣

蜀都賦外負銅梁唐武后長安三年置縣以界有是山也○廢巴川縣寰宇云唐開元年割石鏡之南銅

君果通經 卷之三  
梁之東置巴川縣以地在巴川為名至元併入銅梁  
今縣有宋時巴川社倉碑

### 定遠縣

本合州之石鏡縣地宋開禧中增置河溪縣元立武  
勝軍行河溪安撫事尋改名定遠言永遠安定矣後  
改為縣 國朝因之

### 安居縣

周武之柔剛縣也隋改今名屬安居郡以其地可安  
居矣唐宋屬普州國初併入銅梁成化中復析置○  
廢隆龕縣在縣西二里隆龕山下唐避諱改隆為崇

此縣與安岳各有其半乃舊安居云

### 忠州

管鄆都墊江二縣

二漢之臨江縣梁改為郡兼置臨州矣唐改今名取  
巴蔓子嚴顏之節也樂子正曰地邊巴徼當懷惠而  
忠信矣宋以度宗潛邸陞咸淳府蓋在改元之初云  
○本志治東百里北岼有臨江城元置臨江鎮巡檢  
司今仍又云東南二百里廢龍渠縣宋置元省入

### 鄆都縣

本巴郡枳地也漢永元二年分枳置平都縣蓋山名  
云改平為豐自隋始豐傍加邑國初始○廢南賓縣

唐武德置以屬南賓郡者郡併志州而縣併鄧都也  
今縣治前有南賓渡

### 墊江縣

古墊江今合州是後魏恭帝三年始置於此取漢之  
舊名也墊下也與昏墊同仰水下流皆得稱之蜀中  
見者凡三一為合州蜀志先主自墊江入涪是也一  
為劔州漢書地理志云梓潼江水南流四里至墊江  
入涪水是也一為今縣縣界有桂溪乃唐桂溪縣址

### 涪州

管武隆彭水二縣

集韻涪漚水泡也水出牂柯費州外南至黔江入州

本漢涪陵縣西魏置合州乃移今州名矣按涪水音  
聲在十一尤韻而七虞無此字雖古韻相通蜀人舍  
本從他不知何謂○郡隋廢為鎮唐武德初復

### 武隆縣

漢枳地唐武德初置縣因山名曰武龍 國初易隆

### 彭水縣

彭鼓聲峽水澎湃似之隋開皇中與黔州同置宋紹  
定間陞為紹慶府以慶雲見于境也太宗時事蓋追  
改云○廢洪杜縣洋水縣俱唐武德置今之洪杜溪  
洋水鄉是○廢信寧縣隋大業置即今之信寧巡檢

司也○廢都濡縣唐貞觀置即黃山谷所稱都濡月  
免茶也

黔江縣

秦黔中郡地隋開皇中於此置石城縣唐天寶中改  
名因郡舊也

酉陽宣撫司

秦得楚地因置縣于大酉山之陽屬黔中郡漢置郡  
爲武陵牂柯矣唐徙治婺川縣蓋今思州是黃巢之  
亂酉陽內訌駙馬冉人才征之畱守其地即今理也  
宋元陞州冉氏世知州事 國初改今官隸重慶府

以石耶洞屬

石耶洞長官司

其洞有大石也宋宣和中楊昌安者太原楊業之裔  
也討平蠻亂蠻人畏服因世其地元時尚稱土知府  
國初歸附隸酉陽後

邑梅洞長官司

邑以樹稱在酉陽之內宋末有楊光甫者亦楊業後  
據其地元改爲拂鄉洞矣明玉珍改邑梅軍民府  
國初改今官隸酉陽永樂初改隸重慶

平茶洞長官司

君鼎... 卷之三  
吳之黔陽縣地也五代沒于番宋政和中得之置平  
茶洞猶乎葭萌以茶氏矣元改今官隸思州安撫後  
立軍民府授楊大雷為世官 國初改今官屬酉陽  
改隸重慶

下川東道屬

夔州府

管一州十二縣

春秋時子國秦漢巴郡地也獻帝初平中置固陵郡  
尋為巴東矣唐初曰夔天寶至德之載皆稱雲安郡  
乾元以後復稱夔至今按山海經岷山多夔牛注爾  
雅夔牛即犍牛也肉數千斤出蜀山或地有此獸或

山形似之如犍為之類。江關都尉兩漢立漢書地  
里志云江關都尉理魚復是也。○白帝城公孫述立  
郡國志云述至魚復有白龍出井中因號魚復為白  
帝城是也。○永安郡蜀先主立三國志云先主伐吳  
不利自夷道還改白帝為永安郡是也。○三巴校尉  
宋太始年立寰宇記云山峽險隘多盜賊乃立三巴  
校尉以鎮之是也。○信州梁天監年立方輿云梁置  
信州治白帝城周移治永安宮南是也。○其後王孟  
二蜀以施夔忠萬置鎮江軍後唐改寧江軍節度使  
宋因之南渡後陞為帥帶歸峽州兵甲司公事。○今



下關城即江關瞿唐右所設白帝城學宮即永安宮  
址而材官屯戍皆隸楚以示犬牙相制之義

### 奉節縣

春秋時魚邑漢晉魚復縣也西魏易為魚人屬信州  
唐貞觀中改今名州廢而節存不忘信矣

### 巫山縣

楚為郡秦漢為縣皆曰巫矣加山字自隋始治南有  
山如其字也晉魯置建平郡於此

### 大昌縣

本巫地晉置建昌縣尋改恭昌矣今名後周以避諱

也後戶宇文泰

### 大寧縣

晉北井縣周併入大昌矣宋開寶中始以鹽井地  
大寧監與治側永安城相對取安寧之義也宋陞  
州領縣五其一為大昌 國朝降縣與大昌俱隸  
其四縣割入陝之漢中

### 雲陽縣

胸臆舊縣地在縉雲山之陽也宋張灝記形勝東有  
崔塘西有縉雲矣後周為 縣宋置軍監元改今

名

萬縣

梁置萬州於宣漢縣云其地有萬頃紀數也○蜀漢之南浦縣以浦名後周之萬川郡以川名俱在縣治距治西百二十里武寧巡檢司則隋武寧縣之故址

梁山縣

西魏有魚泉縣分胸臆所置今縣又分自魚泉矣以高梁山為名張載所謂巖巖梁山者也尾入岷江

開縣

今理舊漢豐縣亦析胸臆置也後魏末年置開合二州以對待立義矣其曰盛山郡者以山名曰開江縣

者以江名曰萬歲縣者以谷名曰新浦縣者以浦名

○盛山開江俱在治前萬歲新浦相距兩舍

新寧縣

宕渠之地西魏廢帝始置取寧靜之義也

建始縣

漢巫縣地吳孫休改巫為建平郡始置今縣依郡立名也唐以後隸施州 本朝隸夔

達州 管東鄉太平二縣

宕渠之東界胸臆之西界其地居四達矣後漢之宣漢縣梁之萬州西魏隋唐之通州通川郡更迭為稱

宋改今名以別於淮南之通州也。○廢井州廢石城縣俱後魏廢帝立。○廢永睦縣廢三岡縣俱梁大同立井州石城即宣漢地永睦三岡相距百里

東鄉縣

梁有新安縣析宕渠西界置西魏再析而為今縣與漢中西鄉分界故別之縣有巴渠里即舊巴渠縣址

太平縣

國朝正德十年割東鄉之太平里置因以為名

石砭宣撫司

漢屬牂柯郡後周以之置施州矣唐改曰清江郡重

慶志以為宋之南賓縣也景定中馬什用破元兵授鎮國上將軍石砭安撫領銅牌鐵印世守其地國初改為宣撫按宋地志南賓縣舊屬忠州寰宇記牂州有賓化建安二縣賓化無事迹建安下載石潼柱蒲二關其殆合之以成義耶砭字韻不載疑即柱隸夔州府

遵義道屬

遵義軍民府

管一州四縣

漢夜郎且蘭二縣地屬牂柯郡唐貞觀始置郎州尋改播州乾符中沒於南詔太原人楊端收復之遂世

有其地曰安撫司宋大觀改遵義軍取唐縣名也元  
陞播州宣撫司 國朝改宣慰萬曆二十六年楊應  
龍反蕩平改府仍取唐名

遵義縣

唐貞觀中與郎州同置初名恭水再改而為今名即  
元之播州鎮撫也 國朝改長官司萬曆二十六年  
平楊酋改置

桐梓縣

亦平播置唐武德中以梓潼縣為充州開元改夜郎  
縣即此也縣曰桐梓存其半驛曰夜郎仍其舊

真安州

唐貞觀中置播川鎮尋改珍州以界有降珍山也宋  
乾德中刺史田遷乞改為西高州元復珍州明玉珍  
據蜀改為真州自諱也 國朝因之為長官司播平  
改流加安字

綏陽縣

隋大業中置屬思州宋大觀中於此置承州宣和中  
州廢地隸珍州今縣蕩平後置志云治在觴竹里又  
云黔之龍泉縣有綏陽場名本此

仁懷縣

唐貞觀五年

容縣從山名也地有仁水今縣從

水名

蜀郡縣古今通釋卷之四

閩中曹學佺能始著

川北道屬

保寧府

管二州八縣

古巴國地秦置閬中縣後漢建安劉璋自安漢徙巴西郡於此唐宋則稱閬州矣元改今稱沿後唐保寧軍之目○廢北巴西郡宋元嘉置廢南梁州梁天監置皆因李雄之亂理無定處○廢隆州廢盤龍郡皆西魏平蜀置盤龍者以郡南盤龍岡為名隆州者取其連岡地勢高隆為名後魏典略云此州故有隆城

謂之南隆唐先天避玄宗諱改爲閬州○廢保寧軍節度使後唐天成置廢安德軍宋初置○按十道錄云果閬二州貞觀中屬劍南道天寶中屬同開元中屬山南道乾元中屬同若據地勢言之嘉陵江旣在劍門之外流歷果閬合三州而入涪江且三州同是漢巴郡之地合屬山南道

### 閬中縣

高門曰閬閬山四合邑居其中而水遶之○廢奉國縣梁大同中于此置白馬義陽二郡後魏恭帝二年廢義陽郡改爲奉國縣以此地來附于魏故名元省

入閬中縣志東百里有奉谷鄉國谷音同而譌

### 蒼溪縣

東漢漢昌縣也今縣隋改取蒼溪谷爲名

### 南部縣

梁之南隆縣也今縣亦隋改以部分在郡之南○廢西水縣梁大同中于此置掌天戌因掌天山爲名後周閔帝元年改戌爲西水縣以界內西水爲名元省入南部按府志城南五十里有西水橋是南部界○廢晉安縣按四夷縣道記梁于此置金遷戌後周改爲郡仍置晉安縣郡所理也元省入南部縣志北九

十里有晉安堡○廢新政縣唐武德中于此置新城縣後以隱太子諱改爲新政縣元省入南部縣志今之積善鄉是○廢新井縣唐武德中置縣界頗有鹽井因立斯名元省入南部縣志今之政教鄉是

### 廣元縣

元置廣元猶漢之廣漢也古葭萌地葭萌苴侯名蜀侯之弟續事始曰葭茶也蜀人以茶字郡○廢綿谷縣東晉太元中于此置興安縣隋開皇中改爲綿谷縣以東南綿谷爲名總志廢綿谷縣在廣元之烏奴城北○廢平蜀縣後魏恭帝二年于此置義城縣隋

改義清唐改胤山宋乾德三年平蜀改爲平蜀縣且避諱也元併入廣元○廢嘉川縣宋武帝于此置與樂縣後魏恭帝改爲嘉川縣取嘉陵水所經爲名後併入廣元憲綱有嘉川鄉是

### 昭化縣

古葭萌白水地秦使司馬錯自劍閣道伐蜀之所由也劉宋爲宋安唐爲益昌矣昭化舊屬利州利州蓋嘗稱昭武者宋開寶敕改今縣沿其舊名○廢景谷縣本漢白水縣宋武帝于此置平興縣即元和志揚難當克葭萌分白水置平興者隋開皇中改平興爲

景谷縣即華陽國志陰平郡自景谷有步道徑江油左擔行出涪者按昭化憲綱縣北百里有白水鎮周圍五里俗稱沙州城也先主斬楊懷高沛于此○廢葭萌縣本漢葭萌地蜀先主改為漢壽晉武帝改為晉壽隋開皇始復舊名元省入昭化志云栢林舖是葭萌縣故址○廢岐坪縣宋武帝于此立宋安縣後魏廢帝改為岐坪取岐坪川為名宋改入昭化按晉書作岐愜未詳

劍州

蜀漢立梓潼郡霍峻之所守也諸葛武侯以大劍山

至此有隘束之路故曰劍門唐始以之名州○廢南梁州廢安州俱梁時立廢始州西魏時立以先下安州始通巴蜀也○廢隆慶府宋時立以孝宗潛邸也○廢普安縣本郡也廢為縣今廢為驛在城○廢下辨縣宋元嘉中以武都流人于此安置因立縣大明二年改為武連縣今併入州治西百里上亭驛是又二十里有武連橋○廢劍門縣今為劍門驛華陽國志云劍閣三十里至險有閣尉桑下兵民也○廢臨津縣舊圖經云梁天監于此置相原縣隋開皇改為臨津縣以其俯臨潼水為名今州南二百五十里有



義津即此地。○廢普成縣。周地圖云梁于此置梁安縣。天和中改為黃安縣。唐末改為普成縣。今州有普成鄉。是按本志云故縣南一里紫霄觀舊名普成觀。晉宋間有李隱君名普成者煉形于此上昇。○廢華陽縣。廢茂陵縣。已上俱舊廢者。益州志云宋大明年置此二縣。一隸南安郡。一隸扶風郡。後魏俱廢。○廢七盤縣。唐文視年于七盤山東南置山在廢武連縣之西俱併入州。

### 梓潼縣

蜀古志云禹于尼陳山伐梓其神化為童子漢所為名縣也。蜀晉之梓潼西魏之潼川郡理。○按此語出翰墨全書方輿勝覽引之。

巴州管南江通江一縣

江流如字西魏寔始稱州。唐迄國初不改。洪武九年降縣。正德十年平山寇復為州。○廢漢昌縣。東漢時立廢歸化郡。廢北水郡。俱劉宋立以領獠戶。○廢木門郡。梁時立。○廢大谷郡。後魏立。○廢清化郡。隋大業立。○廢靜州。唐武德立。○廢化成縣。梁普通年于此置梁大縣。後周地圖云大象二年改為化成縣。以化成山為名。州志舊化成縣在治西五十步。○廢恩

陽縣梁普通年于此置義陽縣以義陽山為名隋開  
皇年改為恩陽縣按義陽山古名三峰山下有巴蛇  
洞即據遺所載靜州知州王鶚子讀書義陽山而遇  
梅仙者靜州即巴州也○廢曾口縣梁普通年置以  
曾口谷為名今州東五十里有曾口渡○廢其章縣  
梁普通年置以其章山為名郡志舊其章縣在巴州  
東八十里有古蓮池是其故址本志作奇章以為即  
牛僧孺封邑未詳○廢始寧縣亦梁普通置宋初併  
入其章○廢清化縣梁普通年于此置伏強縣隋開  
皇年改為清化縣州志舊清化縣在州西北六十里  
宋初併入清化

南江縣

○廢盤道縣後魏恭帝置因龍腹山道路盤屈為名  
宋初併入清化

後周之難江縣也唐沿西魏置集州矣宋廢州存縣  
國初易難為南○廢集州以東北集川水為名今  
縣學即集州址○廢符陽郡唐天寶立○廢符陽縣  
後魏正始年置取符水為名本志東南隅廣濟橋銘  
有符陽縣字開元中刻也○廢大牟縣唐武德年立  
取大牟山為名宋初併入難江

通江縣

治枕巴江也唐時壁州理此 國初徑屬府正德改  
隸巴州○廢諾水縣後魏大統年置按諾水潮聲聽  
之若諾應也此即宕水所激○廢壁州唐武德年置  
以縣西壁山為名今縣治即州故址○廢廣納縣以  
縣界廣納溪為名宋初併入通江○廢巴東縣唐開  
元年于此置太平縣以太平川為名天寶改為巴東  
縣以處巴江之東為名宋初併入通江○廢白石縣  
後魏廢帝立以白石川為名本志縣東百里有舊白  
石古城周遭石壁可容萬人四隅石門亭址俱存有  
淳熙間題詠下為白石寺

### 利州衛

葭萌國梁承聖中為利州也前後曰漢壽者漢曰晉  
壽者晉曰小益者後魏曰義成者隋曰益昌者唐曰  
昭武軍者偽蜀曰武寧軍者宋○衛與廣元縣同城  
廢址見前

### 順慶府

管二州八縣

安漢充國二縣地唐置果州取充實之義也一曰以  
郡南果山為名宋寶慶初寧宗潛邸遂有今號○廢  
巴郡劉璋立○廢南宕渠郡劉宋立○廢永寧軍五  
代蜀立○按本志充國在城南安漢在城北各三十

五里

### 南充縣

漢充國縣蜀增南字隋減國字是以有今稱也

### 西充縣

唐武德年析南充置西溪水出焉○廢流溪縣唐開  
耀年置即西溪也元省入西充

蓬州 管營山儀隴二縣

梁天監中置相如縣長卿桑梓也今名後周所改圖  
經云兩蓬高峙屹然雲霄○廢伏虞郡梁初置廢咸  
安郡唐天寶置○廢相如縣梁置兼立梓潼郡于此

李商隱詩梓潼不見馬相如是也相如故宅今為州  
治○廢蓬山縣梁大同中于此置綏安縣唐至德中  
改為蓬山縣今省入州

### 營山縣

分相如置朗池始梁終唐皆然宋祥符避諱改今名  
以治有山如營壘也○廢良山縣梁大同于此置安  
固縣唐開元改為良山縣元省入營山志云三十里  
有良山鎮縣址為興福寺○廢朗池縣以臨古朗池  
為名唐貞元年移于營山歇馬館為理

### 儀隴縣

梁天監置在大儀山之坂坂大曰隴山有石銘儀隴  
二字○廢隆城郡梁置兼立儀隴縣縣城在金城山  
頂四面懸絕石壁高八十丈周迴五里惟西南稍通  
人馬唐開元年移于山下平溪即今理也○廢伏虞  
縣隋開皇置以伏虞山為名元省入儀隴故址在縣  
東六十里○廢蓬池縣梁天監于此置大寅縣取大  
寅山為名唐廣德改曰蓬池取蓬水為名元省入儀  
隴

### 廣安州

管渠鄰水大竹岳池四縣

宋合果渠三州地開寶初于濃洄鎮置廣安軍取安

輯之義矣元為府 國朝降為州○廢渠江縣後漢  
為賓城縣有古賓城在焉一名始安城梁于此置始  
安縣唐至德年改為渠江縣宋割屬廣安軍總志渠  
江舊縣在廣安州北五里

### 渠縣

漢宕渠縣也石過水為宕水所居為渠蜀漢晉隋皆  
置郡于此○廢流江縣周明帝立今為縣治

### 鄰水縣

水出鄰山中有大磧懸流十丈者也梁置○廢鄰山  
縣亦梁置鄰山者其山重疊鄰比相次也隋併入今

縣有鄰山鎮

### 大竹縣

唐則天時析鄰水縣置紀勝曰達州之地有大竹小竹蓋與縣接壤者○本志云地產大竹砍伐時有白兔走出始初白兔寺因以名邑此邑舊省鄰山宋紹興復置

### 岳池縣

寰宇記云岳安山在縣東三十五里高六百丈岳池之水出焉唐析南充相如所置也

### 潼川州

直隸管七縣

左倚梓林右枕潼水隋曰梓州五代蜀重和以後梁曰潼川○廢東廣漢郡蜀先主立○廢新都郡晉時立○廢新州梁蕭紀立○廢昌城郡西魏時立○廢東川節度使唐肅宗立○廢武德軍蜀王建立○廢靜戎軍安靜軍俱宋立乾道間又陞瀘南為潼川府路安撫使而潼川守臣兼果渠懷安廣安等郡兵馬事○廢郫縣常璩云漢高帝六年置舊縣在今縣南九里臨江郫王城基址見存又謂之郫即也蜀志姜維等聞諸葛瞻破乃引軍由廣漢郫道以審虛實即此地今在州治東○廢涪城縣本漢縣後漢初吳漢

入蜀裨將臧宮拔涪城即此邑東晉立始平郡于此  
隋初郡廢縣存州志元省入郿郿復省入州又云涪  
城在州西北六十里○廢富國監本梓州郿縣富國  
鎮新井煎鹽場也宋置監以董其事兼領通泉飛鳥  
等鹽井地去梓州九十里今併入州

### 射洪縣

西魏始置取射江爲名土音以江爲洪後周改之從  
俗也○廢通泉縣西魏于此置湧泉縣隋開皇改爲  
通泉縣取其交注通流下即黃澣川也元省入射洪  
志云治南五十里通泉古驛即杜甫題詩處今爲大

### 澆寺

### 鹽亭縣

秦亭也梁大同始縣有鹽井○廢方安縣李膺蜀記  
云靈江東鹽亭井古方安縣也周地記梁大同元年  
于此立亭因爲縣而方安廢矣○廢高渠郡周保定  
初置以臨梓潼水也隋開皇年廢爲縣縣尋亦廢○  
廢西宕渠郡在安樂村李膺蜀記宋老嘉置領縣四  
宕渠宣城漢初東關是也梁天監廢○廢永泰縣唐  
武德年置元省入鹽亭縣志永泰舊基在縣東北六  
十里○廢東關縣本鹽亭雍江草市也僞蜀明德以

君果通卷之四  
地。去縣遠。遂立招輯院。宋初。陞為縣。元省入鹽亭志。云治東百里有東關市。

### 中江縣

後周為玄武縣。隋唐因之。宋祥符初。勅崇真武。併易今名。以神泉涪城江流所會。縣治當其中也。在蜀為五城縣。華陽國志云。玄武漢時立倉。發五城縣人尉部主之一。曰五成。按爾雅注。成猶重也。即玄武山。○廢懷歸縣。李膺蜀記云。宋元嘉九年。置後周併入玄武縣。○廢凱州。隋開皇置。宋省入潼川府。○廢銅山縣。本蜀道銅山之北。漢文帝賜鄧通鑄錢。即此。唐貞

觀年。置監。上元廢為縣。元省入中江。憲綱離城百七十里。伏獅山乃銅山舊址。○廢飛鳥縣。故郟王城也。隋開皇置。取飛鳥山為名。元併入中江。總志廢飛鳥縣。在潼川州西南百三十里。

### 遂寧縣

東晉置郡。稱遂寧。以其遂寧茲土也。宋宣和初。潛藩陞府。元降州。國朝降縣。○廢廣漢縣。漢高帝置。以屬廣漢郡。○廢德陽縣。蜀先主置。以屬東廣漢郡。按德陽縣有二。其一在川西者。先主以屬梓潼郡。○廢石山郡。後周武帝立。○廢總管府都督府及東川防



御使俱唐武德貞觀等年立。○廢武信軍節度宋初立。○廢小溪縣晉永和年置。後魏恭帝改為方義縣。宋太平興國避諱復為小溪。元省入遂寧。本志小溪廢縣附北郭。廢遂寧縣在東南一百里。今稱下縣。

### 蓬溪縣

本遂州地。唐開元中置唐興縣于此。天寶中改今名。以蓬萊溪在其界內。○廢青石縣。晉孝武帝于此置。晉興縣。後魏武帝改為始興縣。隋改為青石縣。以青石山為名。九州要記云：此山天下青石無佳於此。可為鐘磬。元省入蓬溪。○廢長江縣。本東晉巴興縣。後入蓬溪。今長江壩是。

### 安岳縣

李雄之亂沒於獠。梁普通始置郡。曰普慈。後周曰普州。隋改今縣。以地在山上險而即安之義也。洪武初尚名普州。九年乃為縣。○廢普康縣。周武帝于此置。永康縣。隋開皇改為隆唐縣。唐避玄宗諱改為普康縣。今併入安岳縣。本志普康鎮是。○廢崇龕縣。在今之古龕寺沿革未詳。

### 樂至縣

唐武德三年置取樂至池為名○廢多葉縣周建德  
年置以有神曰多岳也宋併入樂至在今之茗山鎮  
○廢石羊縣元時析置今為石羊鎮



